

Khato ea Tumelo



SABATHA THAPAMA

Bakeng sa Boithuto ba Beke Ena Bala:

Fil. 2:5–11; Matt. 4:18–20; Liketso 9:3–6, 10–20; Johanne 21:15–19; 1 Johanne 3:16–18.

Teman'a Khopolo:

“Le fele le be le pelo e bileng le ho Jesu Kreste; eo leha a na a ema ka sebopelo sa Molimo, a sa kang a lekanya hobane oa utsoa ha a iketsa ea lekanang le Molimo; athe o ifelisitse ka ho nka sebopelo sa mohlanka, ka ho iketsa ea tšoanang le batho” (Bafilipi 2:5–7).

Ho siea khanya ea leholimo, khumamelo ea manyeloi, le ho ba le Ntate e ne e le sehlabelo se fetang kutloisiso. Feela Jesu o tlile lefatšeng lena la mahlomola le lefu hore a tle a senole semelo sa Ntate sa lerato, ho hapa maikutlo a leloko la botho. “Theko ea topollo ea rona ha re na tseba ho e lekanya ho fihlela molopolloa a ema pela Molopolli kapele ho terone ea Molimo. Nakong eo ha khanya ea lehae la rona la bosafeleng e patsima holima kutlo ea rona e tletseng thabo e khaphatsehlang re tla hopola hore Jesu o ile a siea tsena tsohle molemong oa rona, hore ha a ka a ba thoko le mapatlelo a leholimo, empa o nkile monyetla oa ho hloleha le ho ba kotsing ea tahleho ea ka ho sa feleng. Ke moo re tla lahlela meqhaka ea rona maotong a Hae, re hooe pina, ‘Konyana e neng e hlajoe e loketse ho nka Borena, le monono, le bohlale, le matla, le khanya, le teboho.’ Tšen. 5:12.”—Ellen G. White, *The Desire of Ages*, leq. 131. Sehlabelo seo Jesu a se entseng molemong oa pholoho ea rona ha se lekanngoe. Ha re arabela ketapele ea Hae, re amohela taelo ea Hae, ‘me re ikopanya le Eena ho fihlela batho ba lahlehileng bakeng sa ‘muso oa Hae, ho hloka sehlabelo. Leha lihlabelo tsa rona li ke ke tsa lekana le sa Hae ka tsela e fe kapa e fe, bosebeletsi ba khapo ea meea ho rona, ke khato ea tumelo. Bo re tlosa moo re phuthollohileng ho ea metsing ao re sa a tsebeng. Nako tse ling Morena oa rona o re batla hore re etse lihlabelo, empa thabo eo a fanang ka eona e fetisa ka boholo.

**Ihute thuto ea beke ena ho lokisetsa Sabatha sa la 26 Loetse.*

Lerato le Itlhabang la Kreste

Moapostola Pauluse o re khothaletsa ho “ba” kapa ho “lumella” pelo ea Jesu ho ba kahare ho rona. Sena se tlisa potso tse thahasellisang. Pelo [kelello] ea Jesu e ne e le joang? Mehopolo ea kelello ea Hae e ne e busoa ke eng? Taba-khoho ea mehopolo ea Hae e ne e le e fe?

Bala Bafilipi 2:5–11. Litemana tsena li senola khubu ea menahano ea Kreste joang le tsela ea bophelo ba Hae kaofela?

Ho tloha bosahlaheng esale Jesu a lekana le Molimo. Pauluse o patlalatsa ‘nete ena ea bosafeleng ka mantsoe ana, “eo leha a na a ema ka sebopoho sa Molimo, a sa kang a lekanya hobane oa utsoa ha a iketsa ea lekanang le Molimo” (Bafil. 2:6). Lentsoe le fetoletsoeng e le “sebopoho” ke lentsoe la se-Gerike morphē. Le bolela seo e leng boleng ba ntho. Le hokela lintho tse peli tse lekanang ka boleng. The SDA Bible Commentary e e beha ka tsela ena: “Ena se beha Kreste boemong ba tekano le Ntate, ‘me e mo behe holimo haholo ho matla a mang ‘ohle. Pauluse o toboketsa taba ena hore a tle a bontše ka ho hlakisisa botebo ba boitheolo ba boithaopo ba Kreste.”—Pokelo ea 7, leq. 154. Ha a bua ka sebopoho sa Hae sa bosafeleng, Ellen G. White oa tlatsa, “Ho Kreste ho teng bophelo, ba qalo, bo sa alingoang, boo ho seng moo bo tsoang teng hosele.”—*The Desire of Ages*, leq. 530.

Jesu, eo e sa leng a lekana le Molimo ho tloha bosahlaheng, “o ifelisitse.” Le ena ke poleloana ea se-Gerike e thahasellisang. E ka fetoleloa ka kotloloho ho ba “iphelisa.” Jesu o ile a “iphelisa” menyetla le matla a ho ba ea lekanang le Molimo ka boikhetlo hore a tle a nke sebopoho sa motho ‘me e be mohlanka ea ikokobelitseng oa botho. Joalo ka mohlanka, o senotse molao oa lerato oa leholimo ho tlholelo eohle ‘me, qetellong, a etsa ketso ea mapomelo ea lerato sefapanong. O nehelane ka bophelo ba Hae ho pholosa a rona, ka ho sa feleng. Khubu ea mehopolo ea Jesu e ne e le lerato le itlhabang. Ho latela Jesu ho bolela hore re rata joalo ka ha a ratile, re sebeletsa joalo ka ha a sebelelitse, re ruta joalo ka ha a rutille. Ho lumella Jesu ka Moea o Halalelang ho re felisa taba-tabelo tse tletseng boikhabo ho tla re ‘nqosa ho hong. Ho ‘nqositse Jesu sohle. Empa Lengolo ha le bua ka Jesu, le re, “Ke ka baka leo Molimo o mo phahamisitseng ka ho fetisisa, ‘me o mo neileng lebitso le holim’a mabitso ‘ohle” (Bafil. 2:9). Leholimo le tla be le lokeloa ke sehlabelo se seng le se seng seo re se entseng lefatšeng. Ho tla ba le lihlabelo tseleng, empa menyaka ea bosebeletsi e tla li fetisa hole kajeno, ‘me thabo ea ka ho sa feleng ea ho phela le Kreste ka ho sa feleng e tla etsa hore sehlabelo se fe kapa se fe seo re se etsang mona e be ntho feela.

U qetetse neng ho iphumana u lokela ho shoa ka ‘nqeng ea nama ka lebaka la Kreste? Karabo ea hau e re’ng ho uena ka leeto la hau la Bokreste?

Pitso ea Boitelo

Nahana ka ho ba Petrose le Johanne. Letsatsi le sa tsoa chaba hoseng ho hotle ha Galelea, le leleka serame sa moea oa bosiu. Mehopolo ea hau e tsitsitse 'nqa e le 'ngoe feela: ho tsoasa lihlahi, 'me tse ngata le hona. Ho tsoasa ho bile hotle matsatsing a morao tjena, 'me o tatetse letsatsi le leng la ho ea tsoasa ka bongata. Joale e re e sa le hoseng o 'mona a atamela, Jesu oa Nazaretha. Ka nako eo ha u tsebe hore kamor'a metsotsoana bophelo ba hau bo tlo fetoha ka ho sa feleng. Ha u sa tla tsoana le pele.

Bala Mattheu 4:18–20. U nahana ke hobaneng ha Petrose le Johanne ba ne ba ikemiselitse ho etsa boitlamo ho boholo ha kaalo ba ho latela Kreste? Ke eng e hlahang temaneng e supang hore Jesu o ne a ba biletse morero o fetang oa ho tsoasa lihlahi?

Ho tsoa evangeling ea Johanne re ithuta hore banna bana ba ne se ntse ba tseba letho ka Jesu nako e fetang selemo, feela ba ne ba so etse boitlamo bo felletseng ho Eena. Ho tlamela hore e be ho ne ho na le se seng se halalalang ka boitsoaro ba Jesu, se seng ka chebahalo ea Hae, mantsoe, le liketso se neng se bontša batsoasi bana ba Galelea hore o ne a ba memela pitso e halalalang. Lebaka leo ka lona ba ileng ba siea liketsoana tsa bona, mosebetsi, le tikelohlo eo ba e tloatseng e be ba mo latela ke hobane ba ne ba utloa hore ho na le pitso ea morero o phahameng. Batsoasi bana ba lihlahi ba tloaelehileng ba ile ba elloa hore ba ne ba bitsetsoa morero o sa tloaelehang. E ka ba Molimo ha o u bitsetse ho lesa mosebetsi oa hau kajeno, empa o u bitsetsa morero o sa tloaelehang—'me oona ke, ho arolelana lerato la Hae le ho paka ka 'nete ea Hae molemong oa tlotliso ea lebitso la Hae.

Lemoha pitso ea Mattheu, moleketho, ho Mattheu 9:9. U bona eng temaneng ee e tsotelang haholo?

Baleketho lefatšeng la Roma e ne e atisa ho ba bahanyapetsi ba neng ba sebelisa matla a bona a mosebetsing ho hatella batho ba tloaelehileng. E ne e le ba bang ba batho ba hlouoeng ka ho fetisisa Iseraele. Memo ea Kreste, “‘Ntatele,’” e akanya hore Mattheu o ne a ile a utloela ka Jesu 'me pelong ea hae o ne a na le ngongoreho ea ho mo latela. Ha memo e fihla, o ne a lokile. O ne a makaletse hore Kreste a ka mo mema hore e be e mong oa barutuo ba Hae. Botebong ba lipelo tsa rona bohle ho na le ngongoreho ea se seng se fetisang bophelong. Le rona, re batla ho phelela ho hong ho nang le boleng, morero o mong o moholo ka ho fetisa, o khabane ka ho fetisa. Ka baka leo, Kreste o re bitsa, joalo ka Mattheu, hore re mo latele.

Nahana ka seo batho ba ileng ba lokela ho se tela hore ba latele Jesu. Hobaneng ha qetellong ho tla be ho lokeleha?

Pauluse: Sejana se Khethiloeng ke Molimo

Ha Pauluse a amohela Kreste, bophelo ba hae bo ile ba fetoha ka botlalo. Kreste a mo fa bokamoso bo bocha ka kotloloho. A mo tlosa moo a tloaetseng a mo isa maiphihlelong ao a na ke ke a a nahana. Ka tataiso ea Moea o Halalelang, moapostola Pauluse o ile a phatlalatsa Lentsoe la Molimo ho likete-kete tsa lefatše la Mediterranean. Bopaki ba hae ba fetola nalane ea Bokreste le lefatše.

Bala Liketso 9:3–6, 10–20. Litimana tsee li senola joang hore Jesu o ne a na le morero o halalelang bakeng sa Pauluse?

Jesu o atisa ho khetha batho ba sa lebellhang ho ba lipaki tsa lebitso la Hae. Nahana ka banna ba neng ba kenoe ke batemona, mosali oa Samaria, seotsoa, moleketho, batšoasi ba lihlahi ba Galelea, ‘me joale mohlorsisi ea matla oa Bokreste. Bana bohle ba ile ba fetoloa ke mohau ‘me ba romeloa ka thabo lipelong tsa bona ho ea bolela pale ea seo Kreste a se entseng maphelong a bona. Ho ne ho se ea mong oa bona ea khathalang ke ho pheta pale ea bona. Seo Kreste a n’ a ba etselitse sona se ne se babatseha hoo ba ne ba lokela ho bolela. Ba ne ba sitoa ho khutsa.

Bapisa Liketso 28:28–31 le 2 Timothea 4:5–8. Ke lintho li fe litemaneng tsee tse supang hore Pauluse ha ho na mohla a ileng a thekesela boitelong ba hae ba ho fana ka bophelo bohle ba hae ho Kreste bosebeletsing ba khapo ea meea?

Qetellong ea bophelo ba hae, moo a neng a haneloa ho tsoa katlung Roma, Pauluse a tiisa hore “Poloko eo ea Molimo e romeloa lichabeng, ‘me li tla e utloa!” (Liketso 28:28). Tlaleho e supa hore o ne a amohela e mong le e mong ea neng a mo etela ‘me o ne a ba ruta Lentsoe (Liketso 28:30, 31). Qetellong ea bophelo ba hae, o ile a khothaletsa Timothea ho etsa mosebetsi oa moevangeli, ‘me Pauluse o ne a re ka eena, “Ke loanne ntoea e molemo, ke mathile ka qeta sebaka, ke bolokile tumelo” (2 Tim. 4:7). Leha pitso ea rona e ke ke ea ba ea lietsahala tse kholo joalo ka ea Pauluse, Molimo o bitsa e mong le e mong oa rona ho sebetsa le Eena mosebetsing oa ho fetola lefatše. Ho hlakile hore ho sa natse maima ao a tobaneng le ‘ona ka lilemo (sheba 2 Bakor. 11:25–30), Pauluse o ile a lula a tšepahallese pitso ea hae ho Morena. Pale ea kamoo enoa ea neng a hlorisa balateli ba Jesu a ileng a fetoha ‘muelli ea matla ka ho fetisisa oa tumelo ea Bokreste (kathoko ho Jesu) e lutse e le bopaki bo matla ba seo Morena a ka se etsang ka motho ea nehelanang ka bophelo ba hae ho sebeletsa Morena.

Molimo o u biletse ho etsa eng? U ntse u e etsa?

Se Hlokoang ke Lerato

Lerato kamehla le iponahatsa ka liketso. Lerato la rona ho Kreste le re tlama ho etsa se seng bakeng sa batho ba lahlehileng. Pauluse o ile a e hlakisa ha a ne a re ho kereke e Korinthe, “Hobane lerato la Kreste le re tlamile” (2 Bakor. 5:14). Bokreste ha se ho lahla lintho tse mpe feela hore re tle re bolokehe. Jesu ha a ka a “tela” lintho tse mpe leholimong hore a tle a bolokehe. O ile a tela lintho tse molemo hore ba bang ba tle ba bolokehe. Jesu ha a re meme hore feela re fane ka nako ea rona, talenta, le maruo mosebetsing oa Hae; u re memela ho fana ka maphelo a rona. Kopanong ea hoseng le barutuoa lebopong la Galelea, Jesu a hlakisa ka makhethe a maholo seo lerato le se hlokoang.

Bala Johanne 21:15–19. Jesu o ile a botsa Petrose potso e fe makhetlo a mararo, ‘me Petrose o ile a arabela joang? Hobaneng ha Jesu a ile a botsa Petrose potso ee makhetlo a mararo?

Petrose o ile a latola Morena oa Hae makhetlo a mararo, ‘me Jesu o ile a ntša karabo ea lerato melomong ea Petrose makhetlo a mararo. Boteng ba barutuoa, Jesu o ne a aha bocha sebete sa Petrose hore o tšoaretsoe ke lerato le halalelang le hore Jesu o ntse a na le mosebetsi bakeng sa hae tšebetsong ea Hae.

Bala Johanne 21:15–19 hape, khetlong lena u tšoaee karabelo ea Jesu tiison ea Petrose ea hore o rata Kreste. Jesu o ile a mo bolella hore a etse joang?

Lerato le halalelang lea sebetsa, ha le lule feela. Lerato la ‘nete le fetisa feela boikutlo bo monate, le fetisa ho ba taba e monate feela. Le kenyelletsa boitlamo. Lerato le re susumetsa ho nka khato. Le re tataisetsa hore re fihlele lefatše le lahlehileng la bana ba Molimo ba bohloking le maqakabetsing. Ha Jesu a ne a re ho Petrose, “‘Fepa linku tsa Ka,’” e ne e le ka bobeli taelo le tiisetso e khothatsang. Morena o ne a batla karabelo ea lerato, ‘me o na khothaletsa Petrose hore o ntse a na le mosebetsi bakeng sa hae, ho sa natse ketso e soabisang ea Petrose, ha Jesu a ne a tšoeroe, ‘me Petrose ha a ka a latola feela hore o tseba Jesu empa o ile a mo latola le ka mahlapa, hantle kamoo Kreste a na mo boleletse hore o tla etsa kateng. Taba? Ho ka etsahala e be u foselitse Morena hampe feela. Ho ka etsahala e be u mo latotse ka liketso tsa hay ho feta ha ‘ngoe. Litaba tse molemo ke hore mohau o nts’o le teng, ‘me Molimo ha a so qete ka uena. Ho ntse ho na le sebaka sa hau mosebetsing oa Hae haeba u batla.

Joalo ka Petrose, a na u kel’ a, “latola” Morena? Ha ho le joalo, pale, e seng ea ho latola ha Petrose feela, empa le mantsoe a Kreste ho Petrose, li re’ng ho uena?

Boitlamo ba Lerato

Qetellong ea puisano ea Petrose le Jesu, re bona banna ba babeli ba tsamaea lebopong la lecoatle. Ha maqhubu a ntse a otlana lebopong, Jesu o bolella Petrose ka theko ea borutuo. O batla Petrose a tsebe ka ho hlaka hore na o tla tobana le eng haeba a amohela memo ea Jesu ea ho “alosa linku tsa ka.”

Bala Johanne 21:18, 19. Jesu o ile a bolella Petrose eng ka theko ea borutuo? U nahana ke hobaneng ha Jesu a ile a senola ntho e tšosang ha kaalo ho Petrose ka nako eo ea bophelo ba hae?

Ka mantsoe ana, Krete o ne a bolela boshoele-tumelo boo Petrose a tla bo fihlela ka letsatsi le leng. Matsoho a hae a ne a tla otlolloa sefapanong. Tšenolong ena, Krete o ile a fa Petrose khetho. O ile a mo fa thabo e kholo ka ho fetisisa lefatšeng: ho bona meea e hapeloa ‘muso oa Molimo. Ka letsatsi la Pentakonta o ne a tla bona likete li tla ho Krete. O ne a tla etsa mehlolo ka lebitso la Jesu ‘me a mo tlotlise kapele ho likete tse ling tse fetang tseo. O ne a tla ba le thabo e sa feleng ea ho ba ‘moho le Krete thomong ea Hae. Empa tlotla eo e ne e tla tla ka theko. E ne e tla hloka sehlabelo, sehlabelo sa mapomelo. Petrose o kopuoe ho etsa boitlamo ka mahlo a tutubolohileng. Hobane joale Petrose o ne a tseba hore ha ho sehlabelo se sehlo haholo ho mo sitisa ho ikopanya le Jesu thomong ea Hae lefatšeng.

Bala 1 Johanne 3:16–18. Ke eng seo Johanne a re ha se lerato e mpa e le khahleho feela? Johanne o hlalosa sehlabelo sa mapomelo sa lerato e le se fe?

Ha re se re le Bosafeleng, ha ho letho leo re tla beng re le entse le tla bonahala e ka ke sehlabelo. Boinehelo ba rona ba nako le matla, boinehelo ba maphelo a rona, li tla bonahala li putsuoe ka khaphatseho e fetisisang. Ke thabo e ka kang ho fetolela lerato liketso, ho fetola litaba-tabelo boitlamo. Ha re arabela lerato le halalelang ka ho se ikhoaelle letho ha re nanabeletsa ba bang ka besebeletsi oa ho paka joalo ka baemeli ba Krete, re phethahatsa sepheo sa maphelo a rona ‘me re fihlela thabo ea kholo ka ho fetisisa ea bophelo. Joalo ka ha Jesu a e behile ka tsela e tšoanelang, “‘Ekare ha le tseba taba tseo, le lehlohonolo ha le li etsa’” (Johanne 13:17). Monyaka o moholo ka ho fetisisa oa bophelo le thabo ea nako e telele o tla ha re phethahatsa lebaka la boteng ba rona ka ho tlotlisa Molimo ka tsela eo re phelang ka eona le ho arolelana lerato la Hae le ‘nete ea Hae le lefatše.

Ho thata ho utloisisa taba ea bosafeleng, ha seo re se tsebang e le leqhetsoana feela la nako. Empa, ka hohle kamoo u ka khonang, leka ho nahana bophelo bo sa feleng, bophelo bo sa feleng bo botle—bo fetisang eng kapa eng eo re ka bang le eona mona—‘me, ka mokhoa o joalo, hobaneng ho se letho mona, nakong ena e khutšoanyane, le ka lokelang ho re lahlisa tšepiso ea bophelo bo sa feleng eo re nang le eona ho Jesu.

Ho Ithuta Haholoanyane:

“Balisa ba moea ba kereke ba lokela ho rala litsela tseo ka tsona monyetla o ka fuoang setho se seng le se seng sa kereke ho nka karolo mosebetsing oa Molimo. Hangata nakong e fetileng taba ena ha ea etsoa. Ho ne ho se na meralo e hlakileng e behiloeng le ho ntšetsoa pele moo teng litalenta tsa bohle li ka sebelisoang bosebeletsing. Ke ba fokolang ba eelloang boholo ba se re lahlehetseng ka lebaka la sena. “Baetapele mosebetsing oa Molimo, joalo ka balaoli ba bohlae, ba lokela ho etsa meralo oa khatelo pele khato ka khato. Meralong ea bona ba lokela ho ithuta ka tsela e khethehileng mosebetsi o ka etsoang ke litho tse tloaelehileng tsa kereke bakeng sa metsoalle ea bona le bahaisane. Mosebetsi oa Molimo lefatšeng lena ha o na fela ho fihlela banna le basali bao e leng litho tsa kereke ba ema ka maoto ho folofela mosebetsi ‘me ba kopanya matla a bona le a baruti le basebetsi ba kereke. “Pholoho ea baetsalibe e hloka tšebetso ea boikitlaetso ba motho ka mong. Re lokela ho ba isetsa lentsoe la bophelo, e seng re ba emele ho tla ho rona. O, e ka re nka bua mantsoe ho banna le basali a ka ba phahamisang ‘me ba folofela tšebetso! Metsotsoana eo re e fuoeng ha joale ea fokola. Re eme meeling ea lefatše le sa feleng. Ha re na nako ea ho saooa. Motsotso o mong le o mong ke oa bohlokoa ‘me o bohlokoa haholo hoo re ke keng ra o senya ka ho o sebelisetsa ho ikhotsofatsa. Ke mang ea tla batla Molimo ka tieo ‘me a phuthe ho Eena matla le mohau hore e tle e be mosebeletsi oa Hae ea tšepelang mosebetsing oa boevangeli? “Hona le talenta kerekeng ka ‘ngoe, eo, ka tšebeliso e nepahetseng, e ka ntlafatsoang hoba thuso e kholo mosebetsing ona. Se hlokehang ha joale bakeng sa kaho ea kereke tsa rona ke mosebetsi o motle oa basebetsi ba bohlae ho lekana hore ba lemohe ‘me babe ba ntlafatse talenta ka kerekeng—talenta eka ruteloang tšebeliso ea Morena.”—Ellen G. White, *Testimonies for the Church*, pok. 9, maq. 116, 117.

Lipotso tsa Puisano:

1. ‘Mokotaba oa qotsulo e kaholimo ea Ellen G. White ke o fe? E ka ama bophelo ba hau joang ba ho paka le ba bosebeletsi ba kereke ea hau?
2. Lerato la ‘nete le bonahatsoa joang kamehla? Mefuta ea lerato la bohata ke e fe e sa amaneng le lerato la ‘nete?
3. Sehlopheng, buisanang ka lihlabelo tseo batho ba kileng ba li etsa Morena, ho kenyelletsa le ho lahleheloa ke bophelo. U ka ithuta eng lipaleng tsee?
4. Nahana ka karabo ea hau ea potso e qetellong ea thuto ea Sontaha, e botsang ka seo u entseng sehlabelo ka sona bakeng sa Kreste. Hantle-ntle u entse sehlabelo ka eng? Hobaneng ha u se entse? Ho no lokeleha? U ka hlalosetsa joang motho eo e seng Mokreste, seo u se entseng le lebaka la ho se etsa?